

BERITA HARIAN

DATE: 25/08/2007

'Usah lupa sejarah'

Orang Melayu patut berbangga: Tengku Razaleigh

Oleh Nazmi Yaakub

KUALA LUMPUR: Orang Melayu tidak boleh melupakan sejarah kewujudan dan pembinaan tamadun Melayu jati sejak ratusan tahun disebalik rasa bangga serta bersyukur dengan kemajuan dicapai rakyat dan negara sebagai negara yang baru merdeka dalam tempoh 50 tahun.

Ahli Parlimen Gua Musang, Tan Sri Tengku Razaleigh Hamzah, berkata kebanggaan dan kesyukuran itu tidak sewajarnya menyebabkan orang Melayu melupakan sejarah kewujudan negeri Melayu sama ada bersekutu atau tidak bersekutu, sekali gus memiliki raja berdaulat dan pentadbir yang baik.

"Sejarah merakamkan kewujudan tamadun Melayu yang jati itu sehinggalah kita diganggu-gugat oleh kuasa asing yang pada awalnya melebarkan pengaruh, akhirnya mengambil kesempatan untuk campur tangan dalam hal ehwal negeri Melayu.

"Campur tangan berkenaan bermula di empat negeri dengan me-

nempatkan penasihat diikuti negeri Melayu tidak bersekutu sehingga melebarkan pengaruh mereka dan menyebabkan mereka berkuasa ke atas kita," katanya pada sesi pertama Forum Kemerdekaan: Sembang-sembang Kopi 'O' Nasi Lemak di Rumah Gabungan Persatuan Penulis Nasional Malaysia (Gapena) di sini, malam tadi.

Hadir sama Ketua Satu Gapena, Tan Sri Prof Emeritus Dr Ismail Hussein; bekas Menteri Kebudayaan, Tan Sri Sabbaruddin Chik; bekas Ketua Wanita Umno, Tan Sri Aishah Ghani dan bekas Ahli Parlimen Muar, Datuk Malek Munip.

“Sejarah merakamkan kewujudan tamadun Melayu yang jati itu sehinggalah kita diganggu-gugat”

Tengku Razaleigh Hamzah
Ahli Parlimen Gua Musang

Tengku Razaleigh turut mengingatkan pihak yang mempersoalkan isi kandungan yang bersifat fundamental dalam Perlembagaan Persekutuan walaupun ia sudah dipersetujui sebelum kemerdekaan.

"(Mereka mempersoalkannya) seolah-olah tidak ada kontrak sosial atau persetujuan yang dicapai antara Raja Melayu, orang Melayu dan orang bukan Melayu.

"Sekiranya hal itu dirombak (secara sewenang-wenangnya), negara akan menjadi huru-hara dan tidak ada kemajuan seperti yang kita capai pada hari ini," katanya.

Forum Merdeka dinaungi Pertubuhan Berita Nasional Malaysia (Bernama) dan ditaja Arkib Negara Malaysia itu, akan berlangsung 50 jam tanpa henti, sekali gus dicatat dalam *The Malaysia Book of Records*.

Kira-kira 100 peserta hadir dalam forum yang mengungkapkan pengalaman pembicara sebagai individu dan secara kolektif dalam usaha mencapai dan mengisi kemerdekaan serta pencapaian kemajuan negara sekarang.